



**L**a leç regionâl 29/2007 - 'Normis pe tutele, valorizion e promozion de lenghe furlane' - e previôt un moment di verifiche dal so stât di atuazion. Par cheste motivazion si tignarà sabide ai 24 di Novembar a Udin, tal Auditorium de Region, la prime conference regionâl su la tutele de minorance linguistiches furlane, cun **Furio Honsell, Maurizio Franz, Roberto Molaro, Elio De Anna**.

Cun di plui, juste cualchi setemane indaûr, la Agjenzie Regionâl pe lenghe furlane e à firmât un acuardi cu la Universitât dal Friûl, impegnant i 2 ents a meti in vore sinergjiis pe promozion e tutele dal furlan. In proposit o vin sintû il president de Arlef, **Lorenzo Zanon**, par fâ il pont de situazion in teme.

**Te sostance, ce produsaraial di con-**

**cret chest acuardi?**

"O vin za un alc di concret: un dipendent de Universitât al labore in Arlef e il so lavôr al è chel di facilitâ la gjestion dai projets condividûts. L'acuardi al è a la fonde par disvilupâ un grup di vore par concretizâ un impegn gjenerâl come che al è previodût de LR 29/2007".

**Ma fint cumò la Universitât no vevie fat nule?**

"No dîs chest, ma si à di fâ un salt di qualitât passant di un rapuart su projets specifics a une dimension colaborative gjenerâl, cjanant dentri in particolâr la ricerche. La retore **Christiana Compagno** e diviers docents si son dimostrâts une vore disponibili".

**LA CONFERENCE**  
su la tutele  
si tignarà  
sabide ai 24  
a Udin,  
tal auditorium  
de Region

**Nus disial 3 prioritâts pe lenghe furlane?**

"Il recuper dal ûs de lenghe furlane in famee cui fruts; l'inseriment intelijgent dal furlan a scuele, adun cul insegnament de storie dal Friûl; la valorizazion dal furlan no dome come cuistion culturâl, ma come element positif par dut il contest sociâl e economic".

**A ce pont ise la convezion che o vevis fat cu la scuadre di balon dal Udin?**

"In curt o tornarìn a scomençâ parcè che o podarìn contâ sul lavôr di gnûf personâl. Dute la societât, ma in particulâr il president Soldati si son simpri dimostrâts atents e disponibii tai nestris confronts. Une sensibilitât che o sperin e deventi di esempli ancje par altris societâts sportivis".



ilfriuli@ilfriuli.it

# I furlaniscj a cjalin al doman

Interviste a Lorenzo Zanon, president de Arlef, che al fâs un belanç e al fisso lis prospetivis de tutele dal furlan te vilie dal incuintri istituzional dopo 5 agns de aprovazion de norme regionâl.

» DI CHRISTIAN ROMANINI